

Fundacion Betico Croes a keda esableci



ORANJESTAD (AAN)

Ayera, den sala di conferencia di Alhambra Casino, e Fundacion Betico Croes a tene su prome rueda di prensa.

A ser splica cu un directiva a keda elegi, consistiendo di: Presidente Jossey M. Mansur, Vice-Presidente Ruben Yrausquin, Tesorero Basilio Kelly, Secretario Hyacintho (Chinto) Geerman, Segundo Tesorero, Roque Solognier, Segundo Secretaria, Maxima Arends-Croes, Relacionnan Publico Betty Genser, y Comisionan Chinto Tromp, Hendrick Oduber, y Eloy Koolman.

Siman pasa e statuutnan di e Fundacion a keda cla y pasa na Notario.

E objetivonan principal di e Fundacion ta recauda fondo suficiente pa pone un of mas statua di Betico Croes; establece un sistema di beca (segun e froza financiero di e Fundacion, pa estudionan secundario), y e establecimiento di un tipo di museo personal, of un cas cu lo contene e mementonan personal y politico di Betico, cu acceso



pa publico.

E prome proyecto di e Fundacion pa recauda fondo ta e emision di un Moneda conmemorativo cu e cara di Betico ariba e banda adilanti, cu su number y fechanan di nacimiento y morto, y den e parti patras e dicho Voz Populi, Vox Deo, Status Aparte 1986 y e bandera di Aruba.

Lo tin un cantidad limita di e monedanan aki di oro, otronan di silver y otronan di bronz. Ya e monedanan a ser encarga na Rijksmunt y lo ta na venta prome cu dia 18 di Maart. Esnan cu

ta interesa por tuma contacto cu un di e miembronan di e Directiva di e Fundacion.

Den un acto oficial, un delegacion di e Directiva a bishita e mayornan di Betico pa entrega un copia di e actanan di fundacion.

Proximamente unbishita oficial lo ser haci na Gobernador, y contactonan lo haci cu Gobierno pa determina e lugar na unda e statua (full curpa) lo bin.

Periodicamente e Fundacion lo saca comunicadonan di prensa pa tene pueblo informa di tur su accionnan.